


中國方志叢書·華北地方·第四十八號

據
民國三十一年
國董政華等
重修
鉛本
影印

山東省

陽穀縣志

(全)



成文出版社印行



10107735

中華民國五十七年三月臺一版

陽穀縣志

定價：新台幣四〇〇元正

發行人：黃 成 助

出版者：成 文 出版 社

臺北郵政信箱二二六〇五號
電話：九二二〇一〇號

印刷者：正 大 印 製 廠

三 重 市 長 生 街 二 號 之 一

內政部登記證內版臺業字第一一四七號

版權所有

民國三十一年印

陽穀縣志

董政華題

陽穀縣志舊序

今之邑卽古諸侯之國也國必有史邑可無志乎是故周官天下之圖掌之於職方氏四方邦國之志掌之內外史然匪徒紀山川地利以知要害而已蓋所以備採訪垂鑒戒彰風化贊朝廷之盛治者也故鄒魯典籍大備見稱於宣子杞宋文獻不足見惜於仲尼是志之關於世道甚重顧可慢之而不修已乎穀邑無志邑侯靜虛劉公用是歎焉旣而河間張歷田公承命整戎於下車臨清按廵索志蓋欲考古觀風也得民間抄本散逸錯落絕不成書愕然曰是邑向帝丘而背聊關左會河而右朝野在古爲名地在今爲巨鎮獨無志可乎迺進劉公請邑俊致政大夫李北墅先生考訂纂集事竣余除先母宜人憂促裝北行問劉公來曰志必有序其來尙矣邑志成先生爲我序之余謁北墅請觀其分野昭天文也山川昭地利也沿革昭常變也建置昭制度也廟宇昭正祀也樓臺昭儉素也賦稅昭貢法也戶口昭徭役也土

產昭財貨也風俗昭禮義也人物昭賢良也節義昭正氣也武備隱逸等總三十餘條悉實而能華簡而能備微而能顯得古良史之規範焉因賀之曰成千百年之曠典於旬月之間真有以備採訪垂鑒戒彰風化三君子之功豈淺鮮者哉余獨惜賢哲之寥落未有窮於斯志者也自春秋底今二千餘祀宦於斯者豈止千百生於斯者豈止億兆然而名宦僅元之孟公遵道李公謙我朝之劉公洪黃公元和而已鄉賢則于公睿而已其人才之難何至是哉或曰緣無志湮微泯沒耳嗚呼使如孔顏曾孟龔黃卓魯孰得而湮微孰得而泯沒是故無賢哲也有則必有稱述之者矣余獨喜夫志成之後宦於斯生於斯者必將閱志求實指而議之曰某也清慎勤可法也某也慈惠良可思也某也貪暴可惡也某也輕浮可鄙也某也柔懦可懲也某也不學無術可羞也其必砥礪奮發振拔上達而惡居下流賢哲齊出踵至而爭光斯至於無窮矣不然寧不有負於歷田公北墅公靜虛公之望也乎

嘉靖丙申季冬閏月邑人長春子張恂序

序

嘉靖丁酉春陽穀志成予有滇南之行由陸歸穀省先君之墓邑侯劉君以序屬予予謂邑之有志猶國之有史不可缺者也志古所以昭今志今所以示後不病其樸而不華而病其誕而弗實不病其簡而不備而病其僞而失真不病其雜而弗倫而病其私而弗公斯三者作史之大患雖有弗傳雖傳弗永非史氏所深戒者耶矧疆域志而地理昭山川志而形勝見戶口志而虛實分田賦志而貧富著人物志而幽眇顯祠宇志而祀典明官制志而職守辨斯數者一邑之至要蒞斯邑者不可不知焉至於官之臧否俗之好尚古今文章事蹟凡可以資考據而示勸懲者尤所當志顧可以易爲耶吾邑開創百七十餘年尙未有志宦吾邑者固多賢每以邑志未成文獻失徵是恨嘗與一二耆宿纂集繕錄成帙者屢矣又以魯魚亥豕是患卒未梓行深澤劉君以名進士宰吾邑越三載政通人和百廢俱舉乃以邑志託之北墅

李公纂集之李公取舊志而大加增損書成予見其考訂詳而弗陋著述實而弗妄其臧否人物不必直書而因事考實賢否自明誠一邑之信史也欲知吾邑者不必旁搜博訪一展卷間一邑大概宛然在目北墅其有功於吾邑者乎予以邑人嘉缺典之有成故序其始末如此顧不以不文辭也賜進士第通議大夫雲南按察司按察使前河南道監察御史侍經筵官邑人吳鎧書

序

北墅子曰志外史也夏有禹貢周有職方秦漢以下或圖或志代代相因弗替弗失我朝亦因之著一統志頒天下天下則焉各著其志在藩省曰總志在府州曰郡志在縣曰邑志非徒飾吏事炫世之耳目已也蓋天所覆地所載禹跡所及者引縮縱橫條悉萬出是故邑所宜志者郡弗得而什一也郡所宜志者省弗得而什一也省所宜志者天下弗得而什一也刪而愈刪約而愈約邑志可弗作乎陽穀古齊宋會盟之所厥後孔孟之道德漸濡親炙海岱之精靈不限於遐播遺化攸薰遺英攸萃而其民俗之惇信士風之惇直土田差賦之煩重較諸海宇花封得無相與伯仲者耶是其志之作弗容已也邑侯劉公靜虛索舊傳稿志請北墅子復加考證且致兵憲張公歷田拳拳欲成之意北墅不辭緣稿曰實績疏其滯補其遺一其二三繁亂爲卷有五爲目三十有二因繫蠡識區區以著厥由更有缺略後可潤色者統宜

俟夫後之君子云時

嘉靖丁酉孟春望於北墅李際元書於三在堂

重修陽穀縣志舊序

余不佞待罪河東以有祝釐之行事竣歸里適陽穀重修志成邑范公走書徵序於余以識歲月余弗文烏足以辱篇端乎哉已而讀志不覺作而言曰懿哉范侯之用心乎可以觀政矣蓋聞君子之蒞政也不務炫耀之虛名而務修舉之實績不徒粉飾於目前而期昭垂於久永故因時以修政而考政以詔後非仁人之用心不能也公之令於穀者二年矣精明愷悌勤於吏事諸凡綱紀犁然就理而葺學造士建倉儲粟尤其大端頃又加意審編減徭役以蘇民困興衰救弊而穀邑之政煥然一新矣因檢閱舊志喟其未備謂日遠事異宜爲訂正乃委鄉紳宋王二君暨邑庠師儒重加纂輯目仍其舊而略者詳缺者補刪潤增修而穀邑之志亦煥然一新矣於戲公之用心非所謂務實績而期永久者耶余嘗慨久任超遷之法廢而官如傳舍賢者之設施每不克終卽終矣而繼之者人自爲政各行其意民卒不蒙其澤何怪

乎民生之日感也昔周公愍殷頑民遷於洛邑歷世三紀世變風移書稱之曰惟周公克慎厥始惟君陳克和厥中惟畢公克成厥終三后協心同底於道道洽政治澤潤生民使周公之後而非二后之協心則治洛之績隳矣然則公之修政而及於志也意深遠乎夫志也者識也譬之主人經理其家既竭心思矣又懼後之人忘其所有也爲之紀籍以識之俾後人頃刻一覽而家之所有宛然在目肯堂肯構之志勃如也審如是則仁人相繼前後一心將俾穀邑之政日新月盛而愈增爲簡帙之光也則斯志之重刻也豈曰小補之哉余故喜而序之以告後之從政者公諱宗文號任吾洛陽人與余子宗啟同甲辰進士萬曆丙午歲仲冬日長至之吉賜進士第嘉議大夫分守河東道山西按察司按察使兼布政司右參議東阿喬學詩書

序

陽穀舊有志以歲久不無散逸殘缺之患觀者每以爲恨前守茲土者往往欲加重修限於邑務助勦未能也歲甲辰任吾范老父母以洛陽名進士出宰是邑甫下車庶政聿新百廢振舉因索邑志觀之慨然曰志者記也記載弗詳曷以示後卽有志於更新居數月乃進箴及蘇郡二守王君委以纂集之重箴承命唯唯遂取邑志細加檢閱悉從增損殘缺者補失次者正於凡建置之始末疆域之分畫民風之盛衰賦役之繁簡與夫戶口土田物產都社職官學校科貢人才諸有關於政體係於生民者靡不芟繁補遺分門別類乃若黌舍之修整生徒之振興倉庾之鼎新紫荆之創建又皆出自公之睿思擴前人所未暇者倚歟盛哉蓋天生豪傑固將畀之天地民物之重而爲豪傑者亦毅然以其身任天地民物之重而不辭則凡宏遠猷而敷經濟者自能竭精殫思以期報稱固非庸衆所能測識今觀公自履任以來以迄

於今舉凡興革措注設施鋪張無非培養國脈奠安民生之要務他若催科不事督責而輸納恐後聽訟不假敲扑而狡僞獻誠生養休息旬宣拊綏深仁厚澤沾濡優渥又非志之所能悉者公賢聲茂著內召在卽志之修不過甘棠峴碑係吾民深長之思耳志成將梓復屬以敘箴老耄弗能文勉述其概以識歲月云耳

萬曆丙午歲孟冬吉治下鄉官宋箴頓首謹書

重纂刊陽穀縣志舊序

結繩易而書契興國之史家之譜邑之志無地無之然史有專官日載實譜有宗子時紀世系志惟聽之邑令遞代如傳舍久暫異任能否異品往往目爲成帙歷數十年不經挾風俗人物月異歲改致令卜史如墜舟之劍舟行不知幾千里而劍猶故但存古蹟近事莫考卽今陽穀入我明盛官其土者無慮百數留心邑志僅載三令若孟若劉越歲固多范最居後亦已匝世余客歲秋冬之交除兗通判明年春穀令肆覲以內艱歸俾余代庖時缺張秋河捕並委相攝漕輸舳舻銜尾奔走督促無暇晷其於穀志未遑覽忽河使輒以見索根尋原板藏諸梓人毀祖龍矣倉卒括得故家以應夏杪運竣乃搜舊本覓殺青氏重鐫之仍補續邇來仕宦之姓籍興作之因革其有功龔序碑記所存採續文藝類其有功城池各注本官姓字下至如寺建坊碑起樓角週蕭牆三大禮習儀儘足壯皇威覲建三皇廟使民知稼穡衣食之

原均合入志以不沒其善若夫卿士大夫懿行微履各從疏於鄉紳後孝子
貞婦蒙褒獎者一併附錄是集始於新秋逾月而成余信手筆其巔末聊識
編次時日且以告後之人宜稽查版籍所司毋令焚棄將有繼葺或易爲力
若曰敢於操觚竊比作述斷不致若斯之妄也

崇禎四年歲在辛未仲秋吉日承德郎兗州府管糧通判署陽穀縣事直隸
清苑李文林書於東魯別駕之署